



Khutba Jummah

HADHRAT MUHYI-UD-DIN AL-KHALIFATULLAH
Munir Ahmad Azim

09 Juin 2017
(14 Ramadhan 1438 AH)

Après ki li fine salué tous so bane disciples (et tous bane musulmans) dans le monde entier avec la salutation de paix dans l'Islam, Hazrat Muhyi-ud-Din (atba) fine lire Tashahhud, Ta'uz, et Surah Al Fatiha, et li fine ensuite axé so Khutba Jummah lor bane « Prescriptions pour ene Bon Ramadhan »:

Ramadhan fine vini encore ene fois! Celui ki fine gagne l'occasion pou témoigne so l'arrivée, fine très certainement recevoir ene de bane plus grands faveurs ki vine depuis kot Allah (swt). Être présent dans sa lé monde là durant le mois de Ramadhan pas pou ena aucaine sens tanque ki le serviteur pas conner couma pou profite de so bane immenses bienfaits, et très certainement personne faudé pas ignore l'existence et valeur de sa bane bienfaits de Ramadhan là. Ramadhan en tant ki quatrième pilier de l'Islam li ene acte d'adoration (*Ibaadah*) de grande envergure et ki pourvue de bane bienfaits multiples.

Ena tout d'abord so l'aspect spirituel, à savoir le *Taqwa* (la piété). Ene musulman li tenu pou cultive la piété (et la crainte d'Allah) en li-même. Ensuite, nous trouve so bane l'aspects économique, médical et social. Ramadhan li ene acte d'adoration ki so bane bienfaits touche non seulement l'individu mais aussi la société, le pays, voire le monde entier. L'existence d'ene société li essentielle, parski, sans li, la vie pas pou exister dans so sens réel. Afin ki sa réaliser, le savoir vivre li vine alors bien important. Sak dimoune bizin conne so bane devoirs ki li ena, dans la

construction de la société et le rôle ki li bizin jouer. Mois Ramadhan li sans nul doute l'occasion idéale pour mette en pratique bane l'enseignements de l'Islam, afin pou établir ene société exemplaire. Bane bénéfiques sociales zot multiples, par exemple:

1) Ramadhan aide bane serviteurs pou renforci la fraternité entre zot. Nous pé vive azordi dans ene société kot la haine, la jalousie, l'injustice etc. fine prend place dans les cœurs de bon nombre de bane musulmans. Le sectarisme, la division, la dissension, etc. fine démolir l'unité ki Allah, nous Créateur ti commande nous pour préserver:

« Sans doute, zot communauté forme ene sel (ene communauté uni et unique), et Moi, Mo zot Maître. Alors adore-Moi tousel. Mais dimounes fine créer bane division entre zot. Mais (pourtant) tous pou bizin retourne vers Nous. » (Al-Anbiya 21: 93-94).

Avec impé sagesse, réflexion et compréhension, bane musulmans pou capave transforme sa l'état déplorable là en ene saki meilleur, kot la fraternité pou réfaire surface. Zot (c'est-à-dire, bane musulmans) bizin mazine seulement sa kitchose là, ki: **« Allah content l'unité et détester la dissension. »**

Bane musulmans bizin conné ki la Miséricorde d'Allah zamais pas pou atteindre sa communauté là aussi longtemps ki zot pas uni et ki la fraternité pas prend place dans bane les cœurs. Couma ene musulman capave garde *Roza* sans réalise vraie signification de la fraternité, alors ki Allah (swt) fine dire:

« Bane croyants, zot vraiment bane frères. Alors faire la paix entre ou deux frères, et crainde Allah, pou ki ou gagne So Miséricorde. » (Al-Hujurat 49: 11).

2) Ramadhan c'est le mois de générosité. Li invite bane croyants pou faire la charité. En vérité, c'est nous devoir sa, pou soulage nous bane frères et sœurs ki moins dans bien ki nous, bane ki pauvres, parski Allah (swt) fine faire déssane So bane faveurs d'ene manière inégale comme ene épreuve pour bane dimounes. Certains zot pli riches ki bane les autres. Le jeûne (*Sawm/ Roza*) de Ramadhan rappelle au croyant, la faim et la soif de tant de bane dimounes ki victimes de la famine et de la sécheresse. Des milliers de bane dimounes zot victimes de sa bane désastres là tous les jours. Kan ene croyant réalise bane faveurs en grand quantité ki Allah (swt) fine déversé lor li, alors sa dimoune là, sa croyant là, à so tour li étendre la main pou soulage bane dimounes démunis de so pays ou bane ki trouve

dans bane les autres pays dans le monde. De sa façon là, li réalise parole du prophète (saws), kot Nabi Kareem Hazrat Muhammad (saws) fine dire: « *(Ramadhan) C'est le mois de réconfort.* »

3) Bane péchés ena toujours ene mauvais l'influence lor la société et entraine bane mauvais conséquences. L'Islam, couma nous tous conné, fine interdit bane jeux du hasard, vol, corruption, l'injustice, la consommation de bane boissons alcoolique, la drogue, sorcellerie, rende impure saki pure dans l'institution du mariage, faire camarades avec bane dimounes ki défane (*Exemple*: ena bane tel z'hommes, ki quoi-ki zot déza marié, kot courtize (zot fer zot zeste) avec bane femmes de bane les autres, que ce soit dans bane lieux de travail ou bane les autres places, kot zot approche de trop près bane préliminaires de l'adultère en établissant ene soi-disant camaraderie pour approche sa bane femmes là et vice-versa), bref tout saki encourage le déshonneur au niveau de l'individu, de so la foi en ene sel Dieu, au niveau de so famille et de la société en générale.

Kan bane musulmans observe *Roza* de Ramadhan (parski zot bizin faire li avec *Taqwa*), alors tous sa bane kitchoses là, à plus forte raison, zot interdit dans le sens ki bane *Rozédaar* là bizin préserve zot *Roza (Sawm)* en abandonnant tout sa ki interdit, sinon, zot *Roza* pas pou ena aucaine valeur et zot pou privé de la récompense (de *Roza*, de Ramadhan).

Kan bane *Rozédaar* reste loin de bane péchés, la société vine pure; li vine sain, li jouir de plusieurs de bane faveurs d'Allah (swt) et li protégé de bane calamités. Si sa c'est bane nombreux bienfaits de Ramadhan, alors c'est à nous maintenant pou vivre sa mois (béni de Ramadhan) là couma ene vrai musulman. Anou alors resserre nous lien et attrape sakaine de nous bane frères (et sœurs) musulmans zot la main pour réhausse le niveau de nous société et anou travaille ensemble pour renforci le tissu social ki fine si tant affaibli sa derniers temps là. Ki Allah (swt) répanne So pitié lor nous et aide nous pou réalise bane vraies valeurs de Ramadhan, à savoir l'unité, l'amour et la fraternité. *Ameen*.

Vu valeur inestimable mois Ramadhan, c'est le devoir de sak croyant pou vive sa mois béni là dans la soumission totale au Créateur Suprême (Allah). Puisseki nous l'objectif principal c'est ki nous rapproche nous d'Allah (swt), alors nous tous nous appelé pou nous écarte nous de bane interdits et de tout bane actes ki pou éloigne nous de *Zikr* (souvenir) de nous Créateur (Allah).

Ki bizin faire? Multiplier bane actes d'adoration couma *Namaz (Salaat) Nafil*, lire Quran, bane *dua'as*, faire *Zikr* d'Allah entre autres, lever la nuit pour accomplir *Salaat-ul-Tahajjud*, donne généreusement manger à bane pauvres et à bane déshérité, soutenir bane faibles économiquement, socialement etc., et apporte ene soutien ferme à tout projet ki louable pour le bien de la communauté (ki li de côté spirituel, c'est-à-dire, au niveau Jamaat/ de l'Islam, et ki li de côté globale, c'est-à-dire, le pays en entier et la communauté mondiale en général). Et nous bizin accomplir tous sa là, tout en aidant à combattre le mal, n'importe kot sa-sa, sa bane mal là pé sorti. Nous bizin aussi maintenir l'atmosphère islamique dans nous la caze, nous encourage nous famille pou tire avantage de sa mois ki extrêmement béni là, nous aide bane petits pou reconnaître la priorité de sa l'occasion en or là et pou cultive l'enthousiasme pour profite au maximum de sa mois là.

Saki bizin éviter à tout prix: Dormi excessivement, la nuite et dans la journée aussi. Perdi lé temps dans bane dialogues dans vide, que ce soit: kan sorti dépi dans Masjid, dans bane coins la ri, enba bane tabagies, dans nous propre la caze, ou à travers bane téléphones mobiles, bane Smartphones - messages, chats et emails. Bizin évite passe bane longues l'heures temps devant télévision - ti l'écran ou *home cinema* pour touye lé temps. Perdi lé temps dans la cuisine. Pas cuit plisse ki bizin. Évite préparation quotidien de bane bon plats parski bane madames perdi ene lé temps précieux et fatigue zot. Évite aussi alle fer létour magasin tous les jours pou guetter, et pou fer shopping pou passe lé temps. Tout sa faudé pas forme parti de time-table d'ene croyant ki oulé rapproche li avec Allah (swt). Pas précipite dans la lecture du Quran pour termine pli vite possible so bane trente parties. Bizin au lieu de sa privilégié la qualité. C'est qualité ki bizin, pas quantité. Reste loin de la médisance (*Ghibah*), calomnie, malhonnêteté, bane ruses, le mensonge et tout bane acte honteux ki diminué valeur de *Roza*, ou au pire, rende li inutile, évite tous bane disputes familiales ki perturbe l'atmosphère islamique dans la caze.

Donc, ki sait, il se peut ki c'est le dernier Ramadhan ki nous pé accomplir! Anou vive li donc avec ene l'intention d'adieu (comme-ci nous près pou quitte sa lé monde là). Ô Ramadhan! Redonne la vie à nous société, par to venue, enrichi-nous de bane bénédictions et bienfaits divines ki Allah fine conserver en toi pour le salut de So bane serviteurs croyants et obéissants. Ô Allah, faire ki sa Ramadhan là li vine ene Ramadhan exceptionnel, kot li faire nous vine pli près avec Toi, et couma ene avant-goût de To miséricorde éternel pour nous, que ce soit dans sa lé monde ici-bas là et dans *Aakhérat* aussi. *Insha-Allah, Ameen*.